

“Maman!”: e rive la gnove stagjon

Cui 11 di Otubar, su Telefriuli, e torne la trasmission par furlan
che la ARLeF e dediche ai fruts

Une gnove stagjon di Maman! plene di ligrie e di divertiment e je daûr a tacâ! La trasmission televisive in lenghe furlane e je une coproduzion tra la ARLeF - Agenzie regionâl pe lenghe furlane e Telefriuli. Al è un program che, cul divertiment, la narazion e il zûc al mene i fruts tal mont dal plurilinguism e dai tancj vantaçs cognitîfs che si àn cul doprâ plui lenghis fin di piçui.

La date di tignî iniment e je chê di vinars ai 11 di Otubar. Come che al sucêt aromai di nûf edizions, Daria Miani, cun Vigji, il so tui inseparabil, e tornarà ducj i vinars aes 18.30 e in repliche la domenie aes 7 e aes 13 (Telefriuli - canâl 11 dt), par intratignî i fruts dai 4 ai 8 agns.

Une des novitâts di cheste stagjon e je la presince di Desiree Chiappo Debegnach, la simpatiche “vicine di cjase” de condutore. Cun Daria, a regalaran ai piçui telespetatôrs intratigniment educatîf e moments di zûc e di divertiment cun cartons animâts, leturis e musiche.

Cun di plui, a restin lis rubrichis di sucès tant che **"Fasìn un zûc"**, che e cjape dentri i fruts cun zûcs a domandis e **"La cuisine Bete"**, la estrose “cuisine” di Daria Miani (ven a stâi Daria stesse) protagoniste di experiments e di piçui laboratoris cun lavoruts simpatics, che e contarà ancje tantis curiositâts sul Friûl e no dome. E torne ancje **"Zuìn cu lis lenghis"**, cun protagoniscj Max e Leo. I doi fradis une vore zovins, che a fevelin par inglês, par furlan e par talian in maniere fluente, si cjataran cun Daria par insegnâ ai piçui spetatôrs, in maniere lizere e legre, tantis peraulis inglesis e chês che ur corispuindin par furlan.

No podevin mancjâ po i cartons animâts, e tra chei **"I Numeruts"**, la version furlane di “Numberblocks”, la serie innomenade de BBC che e jude i plui piçui a imparâ a fâ di cont.

Dutis lis pontadis de stagjon numar 9 di Maman! – che e larà indenant fin al mêis di Jugn – a saran ancje te *tv on demand* di Telefriuli, tal canâl [YouTube](#) e tal sît de [ARLeF](#), là che si puedin za cjâlâ lis pontadis des stagjons passadis. Cun di plui, tal sît i fruts a podaran cjatâ tancj altris contignûts simpatics su Maman!.

Udin, ai 7 di Otubar dal 2024

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<